

**Hubungan Vietnam-Malaysia kekal erat – Duta
Astro Awani
12 Oktober 2023
Bernama**

KUALA LUMPUR: Vietnam dan Malaysia masih mengekalkan hubungan rapat dan terus berkembang di peringkat dua hala dan pelbagai hala walaupun landskap global dan serantau yang kompleks dan sentiasa berubah.

Duta Vietnam ke Malaysia, Dinh Ngoc Linh, berkata kepercayaan politik semakin kukuh, pertukaran peringkat tinggi berkembang pesat dan perdagangan dua hala pada 2022 melebihi hampir AS\$15 bilion, atau pertumbuhan melebihi 15 peratus berbanding 2021.

"Malaysia merupakan pelabur ASEAN kedua terbesar di Vietnam dan menduduki tempat ke-10 dalam kalangan 140 negara dan wilayah yang melabur di negara kami, dengan modal bernilai AS\$13 bilion," katanya pada majlis resepsi di sini pada Khamis.

Majlis itu bagi meraikan Hari Kebangsaan ke-78 negara dan ulang tahun ke-50 jalinan hubungan diplomatik antara kedua-dua negara.

"Kami adalah rakan kongsi utama dalam ASEAN. Kerjasama dalam bidang seperti pertahanan dan keselamatan, budaya dan pendidikan, dan hubungan antara rakyat juga berkembang pesat," katanya.

Merujuk kepada lawatan rasmi dua hari Perdana Menteri Datuk Seri Anwar Ibrahim ke Vietnam pada Julai, Linh menekankan bahawa lawatan itu telah mengukuhkan asas politik dan menyuntik dorongan baharu kerjasama dalam bidang tradisi seperti politik, ekonomi, pertahanan dan keselamatan, dan berkembang ke bidang baharu seperti ekonomi digital, keselamatan rangkaian dan tindak balas terhadap cabaran keselamatan bukan tradisi.

"Terdapat ruang besar untuk kerjasama lanjut antara kedua-dua negara hasil kekuatan dalaman setiap negara dan peluang yang terbuka daripada ekonomi digital dan Revolusi Perindustrian Keempat.

"Kepentingan dan visi bersama kami untuk keselamatan serantau, kemakmuran dan pembangunan mampan kekal sebagai pemacu utama hubungan dua hala yang teguh, menyumbang kepada Komuniti ASEAN yang padu, responsif dan makmur di tengah-tengah perubahan menyeluruh dan mendalam yang memberikan kedua-dua peluang dan cabaran," kata Linh.

Beliau turut yakin bahawa persahabatan dan kerjasama dalam pelbagai aspek antara dua negara akan mencapai kemajuan luar biasa pada tahun-tahun akan datang, yang akan memberi manfaat kepada rakyat dan menyumbang kepada keamanan serta kemakmuran di negara masing-masing dan serantau.

Majlis malam ini dihadiri Menteri Pembangunan Usahawan dan Koperasi Malaysia Datuk Ewon Benedick dan kira-kira 500 tetamu lain yang terdiri daripada pegawai pentadbiran tempatan, duta, sektor perniagaan dan wakil masyarakat Vietnam di sini.

Vietnam ialah rakan dagangan ke-12 terbesar Malaysia di dunia dan destinasi eksport ke-10 terbesar pada 2022 manakala Malaysia ialah rakan dagangan kesembilan terbesar Vietnam.

Malaysia dan Vietnam mencatatkan nilai perdagangan AS\$19.33 bilion tahun lepas.
-- BERNAMA

© 2023 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/hubungan-vietnammalaysia-kekal-erat-duta-441554>